



Progetu finantziu cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

### **Su contu de Santu Bennadru.**

Una borta sa tentatzioni boliat fai unu biàgiu po scolliai unu bastimentu in unu scòlliu malu, e intzandus ita at fatu Gesùs Cristu? At fatu partiri in su bastimentu Santu Bennadru puru.

Candu funt arribaus acanta de su scòlliu, Santu Bennadru at fatu firmai su bastimentu e at nau:

- Firmai-si ca bandaus totus a si pigai unu buconettu!

Ita faint is marineris? Nci ghetant s'àncara e faint firmai su bastimentu. Lòmpius innui est praxu a Santu Bennadru, custu at nau a sa tentatzioni:

- Bah, nara, tuia abarra innoi.

E dd'at ghetau su rosàriu e dd'at acapiau inni. Imui candu passant scafas in su mari artu sa tentatzioni tzèrriat:

- Stringi Bennadru! Stringi Bennadru! Stringi!

Casi ca bolit a ddu scapiat. Ma Bennadru non passat prus inni acanta poita est giai in unu àteru logu.

### **Su tostoinu**

Ddoi fiant duas gomais ca biviant una acanta de s'àtera. Una de custas teniat puddas e una fiat bessida a domu de sa gomai ca biviati a su costau.

Sa gomai ca iat pèrdiu sa pudda fiat andada aundi fiat s'àtera e dd'iat nada:

- Gomai m'est bessida una pudda de domu, non est chi siat bènnia innoi a domu de bosàterus?

E s'àtera at arraspustu:

- Nossi gomaì, no est bènnia a domu mia.

Imbecis si-dda fiant papendu paris cun su pobiddu e apenas ca iant biu sa gomaì dd'iant imbussada cun su pratu.

Intzandus sa gomaì meri de sa pudda at nau:

- Ita ddoi est in cussu pratu gomaì?

E s'àtera at arraspustu:

- Seus papendi unu tostoinu gomaì.

E issa at arraspustu:

- A tostoinu si furrì!

E sa pudda ca fiat aintru de su pratu s'est furriada a tostoinu.